

- मुख्यमंत्री भजनलाल शर्मा कह्यो—किसानां री उपज रो वाजिब दाम दिरावण माथे सरकार रो खास ध्यान—मुख्यमंत्री श्रीगंगानगर मांय सरसों री सरकारी मोल माथे खरीदी रा काम री सरुआत कीनी।
- शिक्षा मंत्री मदन दिलावर आरटीई रा तहत ऑनलाइन लॉटरी निकाळी—तीन लाख ऊं बत्ता बच्चां ने गैर—सरकारी स्कूलां मांय मुफ्त दाखिलो मिलेला।
- केन्द्रीय मंत्रिमंडल प्रधानमंत्री कृषि सिंचाई योजना रा तैत कमांड एरिया डेवलपमेंट अर जल प्रबंधन ने और बेहतर बणावण री मंजूरी दीनी।
- प्रदेश मांय घणखर ठौड़ां ज़ोरदार गर्मी—श्रीगंगानगर अर दौसा मांय हल्की बरसात।

000

मुख्यमंत्री भजनलाल शर्मा आज श्रीगंगानगर री नुवी धान मंडी मांय किसानां ने बेचान पर्ची दे र राज्य मांय सरसों री सरकारी मोल माथे खरीदी रा काम री सरुआत कीनी। सरकार सरसों रो सरकारी मोल पांच हजार नौ सौ पचास रुपया प्रति क्विंटल तैय कीनो है, जद के चणा री खरीदी पांच हजार छह सौ पचास रुपया प्रति क्विंटल रा हिसाब ऊं करी जावेला। सरसों री खरीदी सारु 13 लाख 22 हजार मीट्रिक टन रो लक्ष्य राख्यी ज्यो है। ई दौरान मुख्यमंत्री किसानां सागे बातचीत करता थकां कह्यो के सरकार काश्तकारां ने साखां रो उचित मोल दिरावणो तैय कीनो है। वे कह्यो के राज्य री मौजूदा सरकार प्रदेश री लारली सरकार रे मुकाबले सरसों रा सरकारी मोल मांय नौ सौ रुपया री बघोतरी कीनी है। श्री शर्मा कह्यो के राज्य री मौजूदा भाजपा सरकार किसानां री बरकत सारु लगातार काम कर रही है।

-----

ई बीचे आज श्रीगंगानगर अर हनुमानगढ़ मांय खरीदी सरु व्ही। काल ऊं पूरा राज्य मांय खरीदी सरु व्हे जावेला। राजफेड रा वाणिज्य महाप्रबंध कार्तिकेय मिश्रा आकाशवाणी ने बतायो के खरीदी सारु किसानां रा नाम माण्डण रो काम एक अप्रैल ऊं सरु कर दियो ज्यो हो। वे बतायो के हाल ताई एक लाख 20 हजार ऊं बत्ता किसान नाम मंडा दीना है अर उपज बेचण सारु हाल ई नाम मण्डाया जा सके है। श्री मिश्रा बतायो के खरीद केंद्रां माथे छाया, पानी अर कानून व्यवस्था बणायी राखण सारु जरूरी प्रबंध करी ज्यो है।

000

शिक्षा मंत्री मदन दिलावर आज जयपुर मांय शिक्षा का अधिकार कानून रा तैत ऑनलाइन लॉटरी निकाळी। ई रे जरिए शैक्षिक सत्र 2025–26 सारु तीन लाख ऊं बत्ता बच्चां ने 34 हजार 799 गैर—सरकारी स्कूलां मांय मुफ्त दाखिलो दियो जावेला। वेब पोर्टल माथे एप्लीकेशन आईडी अर मोबाइल नंबर डाल र मेरिट लिस्ट मांय बच्चां री स्थिति देखी जा सके है। मुफ्त सीट माथे दाखिला सारु राज्य मांय 3 लाख 8 हजार ऊं बत्ता विद्यार्थियां री अर्जियां मिली। शिक्षा विभाग रा शासन सचिव कृष्ण कुणाल चयन प्रक्रिया री जाणकारी देता थकां बतायो के आज ऊं 15 अप्रैल, 2025 ताई स्कूलां मांय मेरिट रा आधार ऊं रिपोर्टिंग करी जा सके है।

दाखिलो लेवण वाळा विद्यार्थियां ने 21 अप्रैल ताई जरूरी कागज़ात री जांच करावणी व्हेला। ई मौके शिक्षामंत्री कह्यो के आर.टी.ई. ऊं वंचित अर कमज़ोर तबका रा बच्चां ने मुफ्त भणार्ई—लिखाई रो सुबीतो मिल सकेला। वे बतायो के राइजिंग राजस्थान

ग्लोबल समिट रे दौरान व्ह्या 261 करार ऊं करीब साढे 15 हजार करोड़ रुपया रो निवेश व्हेला।

000

प्रधानमंत्री नरेन्द्र मोदी नई दिल्ली मांय दुबई रा क्राउन प्रिंस शेख हमदान बिन मोहम्मद बिन राशिद अल मक्तूम सागे मुलाकात कीनी। प्रधानमंत्री मुलाकात रे दौरान मेहमान ने महाराणा प्रताप रा चेतक घोड़ा री मूरत भेंट कीनी। वे मेहमान ने महाराणा प्रताप अर वां रा घोड़ा चेतक रा ऐतिहासिक योगदान री जाणकारी दीनी।

000

आज नवकार महामंत्र दिवस मणायी ज्यो। ई मौके नई दिल्ली मांय राखी ज्यो कार्यक्रम मांय प्रधानमंत्री नरेन्द्र मोदी कह्यो के आब-ओ-हवा मांय बदलाव दुनिया सामी सब ऊं मोटो खतरा है। श्री मोदी कह्यो के इण रो सामो करण रो उपाय समावेशी दिनचर्या है, जिण री जैन समुदाय सदियां ऊं पालना कर रह्यो है। प्रधानमंत्री नवकार महामंत्र रा महत्त्व रो जिकर करता थकां कह्यो के ओ विकसित भारत रा नजरियां ऊं जुड़्यो है।

एसबी प्रधानमंत्री

काल महावीर जयंती मनायी जावेला। ई मौके शोभायात्रावां अर प्रभात फेरियां निकाळी जावेला अर जैन मिन्दरां मांय अभिषेक रा कार्यक्रम व्हेला। महावीर जयंती रे मौके करौली जिला रा श्रीमहावीर जी मांय काल खास मेळो भरेला। राज्यपाल हरिभाऊ बागडे ई जयपुर मांय जैन इंटरनेशनल ट्रेड ऑर्गेनाइजेशन-जीतो री ओर ऊं राखी ज्यो कार्यक्रम मांय नवकार मंत्र ने कल्याण प्रार्थना बतायी। वे कह्यो के ओ मंत्र इन्सान रा भला ऊं जुड़्यो है अर इण मांय विश्व शांति री सामूहिक भावना शामिल है।

000

केन्द्रीय मंत्रीमंडल चालू माली साल मांय प्रधानमंत्री कृषि सिंचाई योजना री उप योजना रा तौर ऊं कमांड एरिया डेवलपमेंट अर जल प्रबंधन रा आधुनिकीकरण ने मंजूरी दे दीनी है। इण रो सरुआती खर्च करीब एक हजार 600 करोड़ रुपया व्हेला। सूचना अर प्रसारण मंत्री अश्विनी वैष्णव आज नई दिल्ली मांय व्ही केन्द्रीय मंत्रीमण्डल री मीटिंग मांय करी ज्यो फैसला री जाणकारी दीनी। वे बतायो के इण ऊं किसानां ने पाणी री हर बूंद ऊं बत्ती उपज लेवण मांय मदद मिलेला। श्री वैष्णव बतायो के ई योजना रो मकसद मौजूदा नहरां अर पाणत सारु पाणी री पूर्ति ने और बेहतर बणावणो है।

000

प्रधानमंत्री नरेन्द्र मोदी कह्यो है के वक्फ संशोधन बिल 2025, सामाजिक न्याय री दिशा मांय खास कदम है। वे कह्यो के अब वक्फ री पवित्रता संरक्षित रेहवेला अर कमजोर तबका रा लोगां अर मुस्लिम महिलावां रा अधिकारां री हिफाजत व्हेला। वक्फ संशोधन बिल ऊं महिलावां ने मजबूत बणावण री मुहिम ने ई बधावो मिलेला।

000

प्रदेश मांय घणखर ठौड़ां ज़ोरदार तावड़ो पड़ रह्यो है, हालांकि कठे-कठे हल्की बारिश दर्ज करी ज्यो। श्रीगंगानगर जिला रा श्रीविजयनगर मांय दोपहरां री बगत बिरखा व्ही, जद के सीकर मांय काल सिंज्यां हल्की बरसात व्ही। ई बीचे बाड़मेर मांय आज लगातार चौथा दिन पारो 46 डिग्री सेल्सियस रे पार दर्ज करी ज्यो, जो सामान्य ऊं 7 डिग्री सेल्सियस बत्तो है। जैसलमेर, बीकानेर, चित्तौड़गढ़ अर चूरु मांय ई अधिकतम तापमान 44 ऊं 46 डिग्री सेल्सियस बीचे चाल रह्यो है। ई रे अलावा अधिकांश ठौड़ां दिन री बगत पारो औसतन 42 डिग्री सेल्सियस ऊं ऊंचो दर्ज कर्यो जा रह्यो है।

राज्य मांय पड़ रही तेज़ गर्मी अर लू ने ध्यान राखता थकां प्रशासन री ओर ऊं लोगां ने सावचेती राखण री राय दी जा रही है। जिला कलेक्टर ई मौसमी बीमारियां ऊं बचाव सारु सगळी ज़रूरी तैयारियां करण रा हुकम दीना है। ई सागे ई लोगां री

आवण—जावण री खास ठौड़ां पीवण रा पाणी री व्यवस्था करी जा रही है। केई जिलां मांय खास बाजारां अर चौराहां कने छाया ई करी जावेला। कोटा मांय गर्मी ऊं बचाव री कोशिशां मांय सामाजिक संगठन ई प्रशासन री मदद सारू आगे आ रह्या है। डूंगरपुर मांय स्वास्थ्य विभाग री ओर ऊं मौसमी बीमारियां रो सामो करण री तैयारियां री मॉकड्रिल करी ज्यी।